



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Atividade Mensál

Observasaun ba Parlamentu Nasionál

Janeiru 2021

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77257466

www.jsmp.tl

info@jsmp.tl

Facebook: www.facebook.com/timorleste.jsmp

Twitter: @JSMPtl

Tabela Konteúdu

Introdusaun	3
A. Reuniaun Plenaria	4
1) 11 Janeiru 2021.....	4
2) 18 Janeiru 2021.....	5
3) 19 Janeiru 2021.....	6
4) 25 Janeiru 2021.....	6
5) 26 Janeiru 2021.....	7
6) 27 Janeiru 2021.....	7
B. Reuniaun Komisaun A	8
1) 6 Janeiru 2021.....	8
2) 7 Janeiru 2021.....	9
3) 13 Janeiru 2021.....	10
4) 14 Janeiru 2021.....	12
5) 20 Janeiru 2021.....	13
6) 21 Janeiru 2021.....	15
C. Publikasaun.....	16
Konkluzaan no rekomendasaun.....	16

Introdusaun

JSMP iha fulan Janeiru 2021 kontinua halo monitorizasaun regularmente ba reuniaun plenária Parlamentu Nasionál iha Segunda-Feira no Tersa-Feira no reuniaun Komisaun A Parlamentu Nasionál iha loron Kuarta-Feira no Kinta-Feira tantu iha Parlamentu Nasionál no mós atividade Komisaun A iha munisipíu sira.

Ajenda sira iha reuniaun plenaria iha fulan Janeiru nian aleinde informasaun diversu husi deputadu sira, agenda prinsipál sira seluk mak hanesan votasaun ba levantamentu imunidade deputadu sira balun nian hodi ba tuir prosesu julgamentu iha tribunál nu'udar sasin ka testimonha, aprovasaun autorizasaun deklarasaun Estado Emerjénsia (EE), votasaun sentidu kondolénsia ba matebian eis deputadu “Guntur” no apresentasaun rezultadu fiskalizaun Komisaun Especializada Permanente sira nian.

Enkuantu agenda sira reuniaun Komisaun A Parlamentu Nasionál iha fulan Janeiru mak hanesan halo audénsia públiku ho parte relevante sira, diskusaun no aprovasaun ba paraser sira Komisaun A nian no halo diskusaun no aprovasaun ba proposta lei sira ne'ebé Meja Parlamentu baixa ba Komisaun.

A. Reuniaun Plenaria

1) 11 Janeiro 2021

Iha 11 Janeiro 2021, Parlamentu Nasionál halo reuniaun plenaria ho nia agenda sira hanesan tuir mai ne'e:

Ajenda Antes Ordem do Dia:

- Leitura ba Pedidu substituisaun deputadu Sabino Soares "Guntur" husi Sra. deputada Domingas Soares.
- Intervensaun diversus husi deputadu sira.
- Informasaun resposta husi Ministru Asuntu Parlamentár no Komunikasaun Sosiál kona-ba preokupasaun deputadu sira nian.

Iha Ajenda Ordem do Dia:

- Votasaun ba pedidu autorizasaun deputadu Antonio da Conceição para presta deklarasaun iha Ministériu Públiku ho kualidade nu'udar testemuña.
- Votasaun ba pedidu autorizasaun Ministériu Públiku para presta deklarasaun iha Ministériu Públiku nu'udar testemuña ba deputada Lita Sarmento no deputadu Luis Roberto.
- Eleisaun ba membru na'in rua Konsellu Imprensa nian.

Intervensaun diversu husi deputadu sira

Kestaun sira ne'ebé deputadu sira foti iha intervensaun diversu mak hanesan:

- Kestaun atrazu iha pagamentu saláriu fulan 13 ba funsionáriu públiku sira inklui funsionáriu kontratadu no mós legalidade ba asesór sira hodi simu saláriu fulan 13 no husu atu fó filafali tanba kontra lei no husu mós ba Komisaun Anti Korrupsaun (KAK) atu halo investigasaun ba kazu pagamentu saláriu fulan 13 ba asesór sira iha ministériu hotu.
- Deputadu sira mós husu ba Governu atu hadi'a mekanizmu distribuisaun sesta báziku, hadi'a kualidade materiál sesta báziku antes fahe ba comunidade no fornese dadus pagamentu ne'ebé loos no husu mós ba KAK atu akompañia programa distribuisaun aihan sesta báziku ba comunidade hodi halo prosesu investigasaun ba fornese dór sira ne'ebé la fornese aihan ho ijiene (moos) no kualidade.
- Husu mós ba Governu atu halo pagamentu ba subsidiu ne'ebé kanseladu inklui apresenta mós osan restu hira husi subsidiu família ne'e nian.
- Deputadu sira mós husu atu Governu liuhusi Ministériu Obras Públiku (IGE) atu bele hadi'a estrada, ponte no valeta inklui irigasaun ne'ebé mota sobu iha tempu udan hodi bele fasilita comunidade sira nia movimentu no ba irigasaun sira bele fornese bee ba comunidade sira atu halo natar.
- Deputadu David Ximenes kontinua ejize ba Governu, ba Ministériu Negósiu Estranjeiru atu konversa ho Governu Indonezia hodi lori fila hikas ita nia ema ne'ebé lakon iha funu

kontra Indonezia hanesan Nicolau Lobato, Vicente Reis, Helio Pina, Daitula no lider rezisténsia sira seluk tan, bele lori fila sira nia ruin mai Timor Leste.

- Hadi'a sistema fornimentu bee moos iha Dili laran no kontinua halo konstrusaun ba irigasaun sira ne'ebé bele fornese bee ba produsaun natar boot ba aumenta seguransa alimentár iha Timor-Leste.
- Hadi'a no haforsa mekanizmu seguransa iha fronteira liuhusi envolve comunidade sira iha fronteira hodi halo vizilánsia iha fronteira ho másimu.

Parlamentu Nasionál mós halo aprovasaun ba pedidu levantamentu imunidade husi Ministériu Públiku ba deputadu sira mak hanesan tuir mai ne'e:

- Votasaun ba pedidu autorizasaun levantamentu imunidade ba deputadu Antonio da Conceição para presta deklarasaun iha Ministériu Públiku ho qualidade nu'udar Testemuña. Rezultadu votasaun afavor 55, kontra 1, abstensaun 6, votu branku 0, no votu nulu 0 husi totál deputadu prezente na'in 62.
- Votasaun ba pedidu autorizasaun levantemantu imunidade deputadu nian husi Ministériu Públiku hodi ba presta deklarasaun iha Ministériu Públiku nu'udar testemuña ba deputada Lita Sarmiento. Rezultadu votasaun afavor 56, kontra 1, abstensaun 4, votu branku 0, no votu nulu 1 husi totál deputadu prezente na'in 62.
- Votasaun ba pedidu autorizasaun levantamentu imunidade deputadu husi Ministériu Públiku hodi ba presta deklarasaun iha Ministériu Públiku nu'udar testemuña ba deputadu Luis Roberto. Rezultadu votasaun afavor 56, kontra 1, abstensaun 4, votu branku 0, no votu nulu 1 husi totál deputadu prezente na'in 62.

Observasaun JSMP kona-ba agenda votasaun ba kandidatura sira husi membru Konsellu Imprensa na'in rua la konsege tanba membru kandidatura ida ilegivel no kandidatura Partidu Fretilin nian ne'ebé submete naran Sra. Maria Agnes nia retirada tanba kandidatura mak la prontu no tanba ne'e la iha ema jurista ida mak atu prenze rekezitu ne'e ho nu'une parlamentu nasional deside adia votasaun ba semana oin hodi husu ba bankada parlamentár sira atu apresenta sira nia kandidatura.

2) 18 Janeiro 2021

Iha sesaun plenária loron Segunda-feira, 18 Janeiro 2021 Komisaun F ne'ebé trata asuntu Saúde, Seguransa Sosiál no Igualidade Jéneru halo apresentasaun ba relatóriu fiskalizasaun ba Munisípiu Dili no Ainaro no Komisaun D ne'ebé trata asuntu Ekonómia no Dezenvolvimentu apresenta relatóriu fiskalizasaun ba Munisípiu Bobonaro.

Iha intervensaun diversu, deputadu sira levanta proplema sira kona-ba dezenvolvimentu pais nian no surtu Covid-19 ne'ebé fó ameasa ba ema nia vida, proplema sira ne'e hotu preziza atensaun imediata husi Governu.

Hatán ba problema hirak ne'e, Ministru Asuntu Parlamentár no Komunikasaun hateten katak rekomendasaun sira iha relatóriu fiskalizasaun Munisípiu nian, iha asaun balun ne'ebé mak Ministériu competente implementa hela tuir orsamentu ne'ebé iha.

Hafoin ida-ne'e Parlamentu Nasionál mós halo eleisaun ba membru Konsellu Imprensa husi kandidatu sira mak hanesan; kandidatu husi bankada CNRT Sr. Expedito Diaz husi Jornalista ho votu afavor 36 no kandidatu husi bankada PLP Sr. Jordão Antero ho votu afavor 29 no votasaun ba kandidatu úniku husi bankada PD, Sr. Benevides Correia husi área jurista ho votu afavor 53, kontra 3 no abstensaun 4.

Hafoin ida-ne'e Parlamentu Nasionál mós halo votasaun ba edisaun jornál PN Nú.49, I Série-A no Nú.90, I Série-A ho votu afavor 54, kontra 0 no abstensaun 0.

Aleinde ne'e, Parlamentu Nasionál mós halo aprovasaun ba votu de pezar ba asidente aero no terramoto ne'ebé akontese iha Indonézia ho votu afavor 50, kontra 0 no abstensaun 0.

3) 19 Janeiro 2021

Iha sesaun plenária Tersa feira 19 Janeiro 2021 Parlamentu Nasionál halo apresiasaun ba aplikasaun Estadu Emerjénsia liuhusi deputadu sira nia diskusaun no votasaun ba Projetu Rezolusaun Parlamentu Nú.62/V/3^a kona-bá apresiasaun ba aplikasaun Estadu Emerjénsia deklaradu ho Dekretu Prezidente Repúblika Nú.29/2020, 27 Marsu ho votu afavor 37, kontra 0 no abstensaun 10.

Iha sesaun plenária ne'e bankada PD halo deklarasaun polítika kona-ba edukasaun no programa sesta bázika. PD husu ba Ministériu Ensino Superiór atu haree kona-ba prosesu selesaun ba estudante foun ne'ebé tama ba Universidade Nasionál Timor Lorosa'e (UNTL). Iha prosesu selesaun ne'e iha kandidatu balun ne'ebé valor ki'ik maibé liu selesaun no balun ne'ebé valór boot maibé la liu. Enkuantu Sesta Bázika ne'e tuir informasaun kompañia sira balun ne'ebé halo distribuissau ba sasán sira ne'e hamenus fali membru família husi fixa família. Nune'e, husu ba Governu atu bele tau matan ba asuntu sira ne'e.

Iha intervensaun diversu deputadu sira levanta kestaun sira kona-ba moras Covid-19 ne'ebé mak aumenta maka'as iha Atambua-Indonézia ne'ebé halo fronteira terrestre ho Nasaun Timor-Leste lakon sira nia vida. Tanba ne'e husu ba Ministériu competente sira hametin seguransa iha fronteira no halo mós kolaborasun no envolve mós populasau sira husi área fronteira nian.

Deputadu sira mós kestiona problema seluk ne'ebé mak povu sira enfrenta direita iha sira nia moris lorloron. Husu ba Ministériu relevante sira atu buka solusaun ba problema hirak ne'e.

Responde ba preokupasaun hirak ne'e, Ministru Asuntu Parlamentár no Komunikasaun Sosiál hateten katak deklarasaun bankada PD nian ne'e pertinente, nune'e sei hato'o ba Ministériu relevante hodi rezolve. Enkuantu programa Sesta Báziku, Governu halo avaliasaun lorloron ba kompañia fornecedor sira tuir kontratu ne'ebé mak iha. Enkuantu informasaun sira seluk sei hato'o bá Ministériu tutela hodi rezolve.

4) 25 Janeiro 2021

Parlamentu Nasionál liuhusi sesaun solene, iha loron 25 Janeiro 2021 halo leitura ba votu pezar ba saudozu deputadu Sabino Soares "Guntur" ne'ebé mate iha Ospital Guidu Valadares iha loron 23 Janeiro 2021.

Iha omenajen ne'e Parlamentu Nasionál liuhusi kada bankada, hato'o sira nia sentidu kondolénsia ba família matebian. Omenajen ikus ne'e hato'o liuhusi sesaun plenária ordinária ne'ebé aprova ho votu afavor 60, kontra 0 no abstensaun 0.

5) 26 Janeiro 2021

Iha 26 Janeiro 2021, iha plenária *período antes ordem do dia* Bankada KHUNTO halo deklarasaun polítika relasiona ho impaktu Covid-19 ba qualidade prosesu aprendizajen iha eskola sira. Aleinde ne'e, kondisaun no fasilidade sira eskola nian mós fó impaktu ba qualidade aprendizajen. Rezultadu fiskalizasaun deputadu KHUNTO nian iha eskola balun iha munisípiu Likisá nota katak labarik sira tur de'it iha rai mai tuir prosesu aprendizajen.

Aleinde halo deklarasaun polítika, iha parte informasaun diversu, deputadu sira hato'o sira nia hato'o preokapsaun sira kona-ba infraestrutura liuliu kona-ba estrada no ponte sira ne'ebé mak aat, postu saúde sira ne'ebé mak iha área rurál seidak asesu ba eletrisidade, fasilidade ba PNTL sira iha área rurál ne'ebé menus.

Kestaun sira seluk ne'ebé deputadu sira levanta mak kona ba distribuisaun Sesta Bázika, seguransa iha fronteira, edukasaun no subsídiu ba uma kain sira.

Resposta ba preokupasaun hirak ne'e, Governu hateten katak seguransa iha fronteira nafatin kontroladu no eskola sira mós provizóriu sei taka ho razaun prevene Covid-19 labele da'et. Enkuantu kona-ba estrada no ponte sira ne'ebé aat sei hato'o ba Ministériu Obras Públika hodi rezolve.

Iha *período ordem do dia* Parlamentu Nasionál halo diskusaun no aprovasaun ba proposta Lei Nú.11/V(2ª) kona-ba Rejime Jurídiku ba Arbitrazen Voluntária hodi halo alterasaun ba artigu balun Kódigu Prosesu Sivíl nian no Proposta Rezolusaun Nú.4/V(2ª)- kona-ba akordu serbisu entre Governu Timor-Leste no Governu Austrália.

Parlamentu Nasionál aprova proposta Lei Nú.11/V(2ª) kona-ba Rejime Jurídiku ba Arbitrazen Voluntária hodi halo alterasaun ba artigu Kódigu Prosesu Sivíl, aprova ho votu afavor 57, abtensaun 2 no kontra 0.

Entretantu Proposta Rezolusaun Nú.4/V(2ª) kona-ba akordu serbisu entre Governu Timor-Leste no Governu Austrália aprova ho votu afavor 45, kontra 2 no abtensaun 12.

6) 27 Janeiro 2021

Iha 27 Janeiro 2021 Parlamentu Nasionál halo autorizasaun ba Estadu Emerjénsia (EE) ba dala 10. Liuhusi sesaun plenária ne'e Parlamentu Nasionál autoriza Prezidente Repúblika hodi dekreta tan EE ba dala 10 hahú iha loron 02 fulan Feveireiru 00:00 to'o loron 3 fulan Marsu 2021 oras 23:59.

Iha sesaun plenária ne'e ko'alia liu kona-ba razaun extensaun ba EE tanba número kazu infesaun Covid-19 iha nasaun viziñu sira hanesan Indonézia kontinua aumenta. Nune'e Governu presiza kria kondisaun sufisiente hodi prevene moras refere.

Aleinde ko'alia kona-ba razaun kontinua implementa EE, ko'alia mós kona-ba medida prevensaun sira sei mantein ho EE anteriór no kontinua konsentra liu iha área fronteira terrestre.

Nune'e deputadu sira mós husu ba Governu atu kontinua halo kontrolu másimu ba fronteira sira hodi prevene movimentu ilegal no husu mós ba Ministériu Saúde atu kontinua sosializa no halo prevensaun másimu iha teritóriu tomak.

Husi diskusaun ne'e Parlamentu nasionál liuhusi votasaun nominál aprova estensaun EE ba dala 10 ho votu afavor 50, abstensaun 6 no kontra 0.

B. Reuniaun Komisaun A

1) 06 Janeiro 2021

Komisaun A Parlamentu Nasionál hala'o reuniaun iha 06 Janeiro 2021 ho nia agenda sira hanesan tuir mai ne'e:

- Audénsia ho TLPU (Timor Leste Press Union) ne'ebé hato'o nia petisaun hodi kestiona kona-ba rezultadu eleisaun ba kandidatura eleitu husi mídia nian ba sai membru Konsellu Imprensa, Sr. Virgilio Bualale.
- Aprovasaun paraser Komisaun A nian kona-ba pedidu Ministériu Públiku (MP) nian husu deputadu Luis Roberto, deputada Lita Samento no deputadu Antonio da Conceção sai testemoñia hodi presta deklarasaun iha MP.
- Diskute oráriu Komisaun A nia atividade hahú Janeiro to'o Jullu 2021.

Audénsia ho TLPU (Timor Leste Press Union)

Iha audénsia ho TLPU (Timor Leste press Union) ko'alia kona-ba konteúdu husi petisaun ne'ebé sira apresenta hodi kestiona prosesu eleisaun ba membru Konsellu Imprensa ne'ebé nia rezultadu mak Sr. Virgilio da Silva Guterres eleitu nu'udar representante konsellu imprensa no tuir sira katak iha membru sira ne'ebé la prenxe rekezitu hamutuk na'in 256 mak la iha kartaun jornalista hodi bele partisipa iha eleisaun ba membru Konsellu Imprensa ne'e rasik tanba ne'e sira konsidera rezultadu eleisaun ne'e la vale no husu ba Parlamentu Nasionál liuliu Komisaun A atu bele halo paraser hodi kansella rezultadu eleisaun ne'e.

Iha parte seluk representante husi TLPU mós haktuir katak sira prontu atu lori prosesu ne'e ba iha tribunál, maibé sei hein intervensaun husi tribunál nian ba kazu refere antes sira lori ba tribunál no sira mós sei prova evidénsia sira balun hodi hatudu katak prosesu ne'e la tuir ka la prenxe rekezitu sira ne'ebé regulariza iha Lei Komunikasuan Sosiál.

Hatan ba kestaun ne'e, deputadu sira Komisaun A, Sra. Carmelita Moniz husu ba representante TLPU atu buka sira nia advogadu rasik hodi hato'o petisaun inisiál ba tribunál iha prosesu kontensiozu nian no evidénsia sira ne'ebé iha ligadu ho ema na'in 256 ne'ebé la prenxe rekezitu sira tenke prova hodi tribunál bele halo desizaun atu anula ka lae ba prosesu eleisaun ne'e.

Aleinde ne'e deputadu sira mós husu atu tenke apresenta prova sira ligadu ho prosesu kandidatura ne'e nian ho nia akta rezultadu ba eleisaun ne'e nian nu'udar prova ba tribunál atu averigua antes fó sai nia desizaun sira.

Deputadu sira mós husu ba TLPU atu labele hein desizaun husi Parlamentu Nasionál nian ba problema ida ne'e tanba deputadu sira konsidera disputa ida ne'e Parlamentu sei la iha kompeténsia atu anula tanba la iha baze legál. Tuir lei, órgaun ka instituisaun pública estadu nian

ne'ebé iha baze legál atu anula prosesu sira hanesan ne'e mak tribunál no tanba ne'e husu ba TLPU atu lori prosesu ne'e ba iha tribunaál no PN so fó pareser de'it.

Aprovasaun Paraser Komisaun A nian kona-ba pedidu Ministériu Públiku

Iha diskusaun no audénsia ho deputadu na'in tolu ne'ebé hetan pedidu Ministériu Públiku nian atu presta deklarasaun nu'udar testemuña ba kazu sira ne'ebé rezista iha Ministériu Públiku husi parte deputadu Luis Roberto no deputada Lista Sarmiento nian atu presta deklarasaun iha Ministériu Públiku nian ne'ebé ligadu ho ameasa husi grupu Brigada Negra iha konferénsia imprensa tinan uluk hodi ameasa deputadu no deputada na'in rua ne'e relasiona ho prosesu eleisaun ba Meja Parlamentu Nasionál foun.

Tanba ne'e sira rasik keixa ba Ministériu Públiku no Ministériu Públiku loke ona prosesu hodi bolu sira na'in rua sai testemuña ba kazu refere no iha sira nia deklarasaun iha audénsia sira sei fó sira nia deklarasaun liuhusi eskrita de'it tuir pergunta sira ne'ebé Ministériu Públiku hato'o iha karta pedidu ne'e.

Rezultadu votasaun ba pedidu ida ne'e aprovalu ho votu afavor 7, kontra 0 no absteinsaun 0 husi total deputadu prezente na'in 7.

Entretantu pedidu Ministériu Públiku nian ba deputadu Antonio Conceição atu presta deklarasaun iha Ministériu Públiku iha Gabinete Kombate Korrupsaun nian ba kazu korrupsaun ne'ebé husu deputadu Antonio Conceição nia deklarasaun eskrita ba marka prezensa, maibé tanba deputadu Antonio Conceição prontu tanba ne'e nia parte sei marka prezensa atu presta deklarasaun iha prosesu investigasaun.

Rezultadu votasaun ba pedidu ida ne'e aprovalu ho votu afavor 7, kontra 0 no absteinsaun 0 husi total deputadu prezente na'in 7.

Diskusaun kalendáriu serbisu Komisaun A

Deputadu sira mós ohin diskute kalendáriu Komisaun A nian hahú husi Janeiru too Jullu 2021 hodi tau prioridade ba lei sira mak hanesan Lei Podér Lokál no Desentralizasaun Administrativa, Lei Eleisaun Assembleia Munisipál, Alterasaun Kódigu Sivíl, Alterasaun ba Administrasaun Públiku Jerál no alterasaun ba Rejime Jurídiku Arbitrajen.

Aleinde audénsia Komisaun A nian, inklui mós audénsia publiku sira seluk hanesan Komisaun B halo ho Ministériu Negósiu Estranjeiru no Kooperasaun (MNEC) hodi ko'alia kona-ba Tratadu Novayorke nian ligadu ho asuntu Seguransa no Defeza nian no mós ho Komisaun Expo Dubai nian.

Deputadu sira ne'ebé marka prezensa iha reuniaun komisaun A ohin mak deputadu na'in 7 no deputadu na'in 4 la marka prezensa.

2) 07 Janeiru 2021

Reuniaun Komisaun A iha 7 Janeiru 2021 nian ho nia agenda mak hanesan tuir mai ne'e:

- Diskusaun no aprovasaun ba Relatoriu Paraser Komisaun A sobre rezultadu audénsia Komisaun A ho *Association Journalist Timor-Leste* no *Timor-Leste Press Union* ba petisaun sira ne'ebé hatama.

Iha diskusaun ba Petisaun no rezultadu audénsia ne'ebé halo ona ho asosiaun jornalista rua ne'e relaciona ho sira nia rejesaun ba eleisaun ba kandidatura ne'ebé eleitu liuhusi votasaun Sr. Virgilio da Silva Guterres husi Konsellu Imprensa ne'ebé representa jornalista sira.

Kazu rejeitasaun ne'e akontese tanba husi parte asosiasaun jornalista rua ne'e konsidera eleisaun ne'e la prenxe rekezitu legál tuir Lei Komunikasaun Sosiál ne'ebé ejize kada votante tenke iha kartaun jurnalizmu hodi bele hetan direitu atu eleje ka direitu ba vota hodi hili representante ba Konsellu Imprensa ne'ebé sei representa sira iha Konsellu Imprensa Timor-Leste nian, maibé iha sira nia observsaun katak Sr. Sr. Virgilio da Silva Guterres la prenxe rekezitu ida ne'e tanba la iha karta lisensa jurnalizmu nian no ema ne'ebé partisipa iha eleisaun 256 la iha kartaun jurnalizmu no sira barak mai husi funsionáriu públiku.

Hatan ba preokupasaun ne'e, iha paraser, Komisaun A rekomenda atu sira lori prosesu ne'e ba tribunál hodi hetan prova sira no tribunál karik prova duni katak prosesu ne'e la tuir lei bele anula.

Iha parte seluk Komisaun mós rekomenda ba PN atu kontinua halo eleisaun ba membru 2 ne'ebé sei representante PN iha Konsellu Imprensa no PN mós bele fó pose dadaun hodi konklui ona eleisaun tanba prosesu tribunál sei la impede serbisu no prosesu sira ne'ebé la'o ona no bainhira tribunál decide anula mak foin bele demite no halo prosesu eleisaun filafali ba kandidatura seluk husi Sr. Virgilio da Silva Guterres ne'ebé demitidu tanba kontra lei ruma.

Rezultadu votasaun ba paraser ne'e aprovalu ho votu sira a favor 7, kontra 0 no absteinsaun 0, husi total deputadu prezente na'in 7.

Paraser ne'e sei hato'o fila-fali ba Meja PN atu halo apresisaun hodi bele hatan ba petisaun ne'ebé hato'o husi asosiasaun jornalista rua ne'e nian ba Parlamentu Nasionál.

3) 13 Janeiro 2021

Reuniaun Komisaun A iha 13 Janeiro 2021 ho nia ajenda sira mak hanesan tuir mai ne'e:

- *Briefing* husi asesór Dr. Pedro de Andrade kona-ba materia pedidu alterasaun Lei Prosesu Sivíl kona-ba Arbitrajen.
- Aprezentasaun planu tarefa no serbisu komunikasaun nian husi Komisaun ba Projetu Parlamentu Nasionál kona-ba Reforma Setór Justisa..

Briefing husi Dr. Pedro ba deputadu sira Komisaun A

Iha *briefing* ne'e, Dr. Pedro de Andrade esprika kona-ba definisaun, ámbitu aplikasaun arbitrajen, estrutura arbitrajen no mós esperiénsia rai li'ur nian kona-ba apalikasaun ho nia durasaun ba iha prosesu arbitrajen ne'ebé sira iha no oinsa Timor-Leste bele atu adopta.

Iha parte seluk, nia mós esplika kona-ba intesaun husi alterasaun ba materia arbitrajen nian. Intensaun mak bele fasilita prosesu sira lais liu kompara ho agora ne'ebé kazu barak paradu iha tribunál. Mekanizmu ida ne'e bele fó kbiit ba ema sira ne'ebé lei atribui kompeténsia ba hodi halo knaar nu'udar árbitru ba rezolve prolema ruma liu-liu ligadu ho kazu kontratu sira ne'ebé dala barak kompañia boot sira bainhira halo investimentu iha Timor-Leste hetan problema no presiza rezolve. Dr. Pedro mós hateten katak arbitrajen nia prosesu la hala'o ba divórsiu no adosaun labarik tanba ne'e so tribunál mak bele halo no arbitrajen ne'e mós la taka dalan atu se prolema ne'e labele rezolve bele lori ba tribunál rekursu nu'udar último desizaun ne'ebé iha atu rezolve prolema ne'e.

Nia mós esplika katak presiza Governu esklareso kona-ba artigu saida mak sira husu atu halo alterasaun iha Kódigu Prosesu Sivíl ligadu ho kapitulu ida kona-ba arbitrajen nian hodi bele guia deputadu sira atu intende didi'ak prosesu ne'e antes halo paraser autorizasaun ba Meja Parlamentu Nasionál fó autorizasaun ba Governu hodi halo alterasaun ba mateia ne'e.

Aprezentasaun planu atividade husi Komisaun Reforma Setór Justisa (KSJ)

Aprezentasaun planu atividade husi KSJ liga liuba serbisu lezislasaun sira ne'ebé sira prepara ona no oinsa atu fahe informasaun ba públiku nu'udar prosesu konsultasaun públiku ida ne'ebé sira sei halo ho apoiu Komisaun A, Parlamentu Nasionál nian no lei sira ne'ebé sira sei halo mós tradusaun ba Lian Tetun hodi fahe nia informasaun xave sira ba comunidade no grupu tarjetu sira ba agora nian mak Lei Podér Lokál no Desentralizasaun Administrativa no Lei Eleisaun ba Assembleia Munisipál.

Esbosu lei sira seluk mós sira sei prepara atu halo ba iha Parlamentu Nasionál atu bele propoin hodi diskute mak hanesan Lei Organizasun Judisiária, Alterasaun Estatutu Majistratura Ministériu Públiku, alterasaun ba Estatutu Majistratura Juis, Lei Formasaun Judisiáriu, Lei Arbitrajen Voluntária no seluktan.

Komisaun ne'ebé lidera husi Dr. Bruno ne'e mós esplika katak sira halo audénsia ho entidade relevante sira hotu. Entidade sira ne'e mak hanesan husi setór justisa nian mak ho autór judisiáriu sira husi Tribunál, Defensoria Públika, CAC, PDHJ no PCIC no entidade sira seluk mak hanesan Ministériu Justisa no Sosiedade Sivíl liuliu ho JSMP. KSJ halo audénsia loron tomak hodi rona sira nia opiniaun kona-ba oinsa atu hadi'a setór judisiáriu ligadu ho lei sira.

No sira mós informa katak úniku instituisaun ne'ebé la koopera ho sira atu fornese informasaun kona-ba sira nia serbisu mak Ministériu Públiku ne'ebé Prokuradór Jerál rasik la resposta ba KRJ nia karta husu audénsia no ironiku liu mak sira rasik mak ho premisaun Ministériu justisa nian hakerek rasik alterasaun ba sira nia estatutu no komisaun konsidera ne'e konflitu interese no husu ba deputadu sira atu bolu antesaun ba Ministériu Justisa hodi la bele autoriza Ministériu Públiku propoin rasik alterasaun ba sira nia estatutu.

Deputadu sira apresia ho esforsu sira husi komisaun ida ne'e no husu nafatin apoiu husi komisaun ida ne'e atu bele tulun deputadu sira ho paraser sira ligadu ho lei sira ne'e hodi bele halo analiza no peskiza klean antes halo aprovasaun ba lei sira ne'e iha futuru.

4) 14 Janeiro 2021

Reuniaun Komisaun A Parlamentu Nasionál iha 14 Janeiro 2021 ho nia ajenda mak hanesan tuir mai ne'e:

- Audénsia Komisaun A ho Ministru Prezidénsia Konsellu Ministru, Ministru Justisa no Sekretáriu Estadu Formasaun Profisionál no Empregu (SEFOPE) kona-ba Pedidu Autorizasaun Lezislativa ba Governu atu halo alterasaun ba Kódigu Sivíl, Kódigu Prosesu Sivíl no alterasaun ba Lei Baze Jerál Organizasaun Administrasaun Públika.

Alterasaun ba Lei Kódigu Sivíl no Prosesu Sivíl

Iha audénsia ne'e, deputadu sira Komisaun A atu rona direta intensaun husi Governu ligadu ho sira nia proposta autorizasaun ba aletarasaun lei tolu ne'e husi Ministériu no Sekretáriu Estadu competente sira ho sira nia preokupasaun ba situasaun implementasaun lei sira iha baze ho nia dezafiu sira.

Proposta alterasaun husi lei rua mak hanesan PPL Nú.101/V (2a) Autoriza Governu para halo alterasaun ba Kódigu Prosesu Sivíl no PPL Nú.11/V (2a) Aprova Rejime Jurídiku Arbitrazen Voluntáriu no Prosede alterasaun dahuluk ba Kódigu Prosesu Sivíl atu integra prosesu arbitrajen nian tuir Konvensaun Nova Yorke nian ne'ebé Timor-Leste iha tinan kotuk asina ona akordu. Konvensaun ne'e trata kona-ba asuntu sira ligadu ho arbitrajen ho nia padraun sira. Ida ne'e, inklui oinsa Timor Leste bele hola parte hanesan nasaun membru. Nune'e, bainhira Timor-Leste nia prosesu disputa sira iha rai laran no mós rai li'ur ne'ebé hakotu husi meu sira arbitrajen nian bele tuir prosedimentu sira ne'ebé iha konsagra iha Konvensaun ne'e.

Reprezentante Governu sira mós esplika katak iha razaun barak ligadu ho mós investimentu sira. Iha preokupasaun ba prosesu justisa iha ita-nia rai laran liuliu ho kazu sivíl sira mak hanesan kontratu no investimentu no ba aktu sira seluk inklui mós kazu kontratu sira iha rai laran ne'ebé dala barak prosesu iha tribunál dura tempu ne'ebé naruk no la iha serteza. Razaun ne'e mak motiva Governu atu kria lei própriu ida ligadu ho asuntu arbitrajen nian atu fasilita disputa sira iha área sivíl nian. Ida ne'e, sei la inklui divórsiu no adosaun labarik.

Deputadu sira Komisaun A konsidera inisiativa Governu nian di'ak tebes, maibé persiza kanaliza iha esbosu lei ruma hodi deputadu sira bele haree atu halo estudu ba inisiativa ne'e relasiona ho sofrimentu husi lei sira seluk ne'ebé eziste hanesan Kódigu Sivíl no Prosesu Sivíl ne'ebé sei afeitadu husi lei ida ne'e.

Alterasaun Baze Jerál Organizasaun Administrasaun Públika

Governu iha sira nia intervensaun haktuir katak objetivu prinsipál husi alterasaun ba Lei Baze Jerál Organizasaun Administrasaun Públika mak fortifika no moderniza administrasaun públiku hodi bele melloria funcionamentu administrasaun públiku iha atendimentu nian ho efisiénsia no efikasias liutan iha futuru.

Governu mós haktuir katak alterasaun ida ne'e mós sei fasilita di'ak liutan serbisu administrasaun públiku sira iha munisípiu ho transparente no menus kustu. Ida ne'e, inklui Governu sentrál no komidade sira bele fasilmente halo supervizaun ba serbisu administrasaun públiku iha nasaun ne'e.

Governu mós haktuir katak planu ba alterasaun ne'e la'o kle'ur ona desde inísiu Governu VIII nia tempu. Halo ona estudu ho modalidade oin-oin hodi adapta sistema administrasaun saida de'it mak di'ak liu no oinsa atu hadi'a iha futuru. Nune'e ohin loron problema boot iha burakratizasaun no ida ne'e mós sai obstáklu ida ba dada investimentu no promove Governasaun di'ak.

Deputadu sira iha sira nia intervensaun haktuir katak sira nia parte husu ba Governu atu apresenta artigu sira ne'ebé sofre alterasaun antes atu fó autorizasaun ba Governu atu bele halo alterasaun ba Lei Baze Jerál Organizasaun Administrasaun Públika nian.

Deputadu sira mós rekoñese katak tempu ona atu halo desentralizasaun iha baze no tanba presija halo adaptasaun ba lezislasaun importante sira hanesan administrasaun públiku hodi halo nia serbisu ho efikásia no eficiente ba povu sira iha baze no la difikulta povu no ajente administrasaun públiku sira rasik.

5) 20 Janeiro 2021

Reuniaun Komisaun A iha 20 Janeiro 2021 ho nia ajenda mak hanesan tuir mai ne'e:

- Komisaun A no B halo audénsia ho Prezidénsia Konsellu Ministru, Ministru Justisa no Ministru Negósiu Estranjeiru.

Audénsia Komisaun rua ne'e prezide husi Prezidente Komisaun B, distintu deputadu Agustino Somocho. Objetivu husi audénsia ne'e mak atu rona direita husi Governu kona-ba importánsia husi ratifikasaun Konvensaun Nova Iorque ne'e ho mós ámbitu husi Konvensaun ne'e atu regula kona-ba saida no tanba saida mak importante ba Timor-Leste atu ratifika, liuliu ligadu ho benefísiu husi reatifikasaun ba Konvensaun ne'e rasik.

Iha intervensaun Prezidénsia Konsellu Ministru nian, haktuir katak objetivu prinsipál husi Governu hakarak Timor-Leste ratifika Konvensaun ne'e mak atu fasilita Timor-Leste nia kazu disputa sira ligadu ho komérsiu nian bele lori ba tribunál arbitrajen sira iha rai li'ur. Estadu parte sira husi Konvensaun ida ne'e nian bele konsidera tanba durante ne'e Timor-Leste la iha lei no sistema abitrajen ida própriu no kualifikadu atu rezolve rasik Timor-Leste nia kazu disputa komersial sira. Bainhira akontese kazu disputa iha Timor-Leste, dala barak liu kazu sira ne'e iha konkordánsia entre parte sira bainhira hodi lori ba tribunál arbitrajen Singapura nian ka rai seluk ne'ebé nia sistema arbitrajen iha vantezen di'ak liu ba parte sira ne'ebé hetan disputa.

Nia mós haktuir katak iha parte seluk, ita nia tribunál mós nia prosesu demora demais. Nune'e, atu fasilita di'ak liu tan investór sira tantu nasional no internasionál, dalan di'ak liu mak ita ratifika Konvensaun ida. Alende ne'e, bele mós dada investór sira mai iha Timor-Leste hodi investe.

Nia mós afirma katak nasaun iha mudansa ekonómia lubuk ida iha tempu agora, tanba ne'e ita presija mós ratifika Konvensaun ne'e hodi adapta situasaun mudansa ekonómia ne'ebé la'o agora dadaun no ba futuru bele fó espasu ba investidor sira atu buka solusiona sira nia problema liuhusi dalan arbitrajen ne'ebé di'ak no fasil liu duke liuhusi tribunál judisiál ne'ebé nia prosesu sei lori tempu naruk liu.

Ministru Justisa no Ministru Negósiu Estranjeiru ne'ebé representa husi Vise-Ministru reforsa de'it Ministru Konsellu Ministru nia esplikaun. Enkuantu relasiona ho lezislasaun nian, Ministru Justisa haktuir katak iha ona lezislasaun komplementár sira atu bele fasilita no dudu prosesu implementasaun ba Konvensaun ne'e rasik. Lei sira ne'e mak hanesan Proposta Lei Rejime Jurídiku Arbitrajen Voluntáriu nian no mós alterasaun ba Lei Kódigu Sivil, Prosesu Sivil nu'udar rekezitu ida atu kompleta liutan imlementasaun Konvensaun ida ne'e nian.

Ministru ne'e mós haktuir katak benefísiu husi ratifikasaun ne'e iha buat rua importante mak só nasaun ne'ebé hola parte iha efeitu vikulativa ba Konvensaun ne'e no Konvensaun ne'e aplika só ba de'it kazu disputa komersiál nian.

Husi Vise-Ministru haktuir katak nia parte pruntu atu implementa konvensaun ne'e liu-liu iha parte balun ne'ebé presija diplomata sira nia kontribuisaun atu promote investimentu sira bainhira ratifika ona Konvensaun ne'e.

Vise-Ministru ne'e mós haktuir katak ratifikasaun ne'e sei fó impaktu di'ak ba ekonómia Timor-Leste nian tanba sei fó espasu ba investór sira mai Timor-Leste hodi halo investimentu. Nia haktuir tan katak Timor-Leste la tarde atu ratifika Konvensaun ne'e no tanba ne'e nia husu ba Parlamentu Nasionál atu apoiu hodi ratifika Konvensuan ne'e hodi manan konfiansa investór sira hodi mai no brani investe iha Timor-Leste.

Deputadu sira mós apresia ho iniciativa Governu nian hodi husu ratifika Konvensaun ne'e no konsidera importante maske sei iha dúvida ba preparasaun Timor-Leste nian depoisde ratifika Konvensaun ne'e, liu-liu ligadu ho quadru legál sira nu'udar rekezitu no mós rekursu umanu no fasilidade sira.

Deputadu sira mós husu atu eleinde ratifika Konvensaun ida ne'e, Governu aselera prosesu adezaun Timor-Leste ba Organizasaun Mundiál Komérsiu nian nu'udar prioridade ba Timor-Leste inklui ASEAN. Nune'e mós presiza regulariza kompañia sira ne'ebé nia sasan nia marka famozu iha mundu ne'ebé tama iha Timor-Leste hodi fó espesu di'ak ba sira atu halo investimentu iha rai laran.

Iha resposta, Governu haktuir katak Governu nia parte komprometidu atu aselera prosesu ba halo lei komplementár sira ne'e no konsidera Konvensaun ida ne'e ladun iha rekezitu ne'ebé barak kompara ho Konvensaun seluk ne'ebé Timor-Leste ratifika ona ne'ebé too agora nia progresu implementasaun sai preokupasaun.

Relasiona ho adezaun Timor-Leste ba Organizasaun Mundiál Komérsiu nian, agora dadaun atu to'o ona konkluzau finál, maibé tanba pandemia mak sei trava hela, mezmunune'e la implika buat ruma se ita ratifika Konvensaun ida ne'e. Ministru Prezidencia Konsellu Ministru mós

haktuir katak adezaun ba ASEAN ne'e mós iha faze prosesu no nasaun barak iha ASEAN mós mak sai membru ba Konvensaun ne'e tanba ne'e fasilmente ba ita atu trata asuntu komérsiu sira iha disputa liuhusi Konvesaun ne'e.

Deputadu sira mós husu ba Governu atu fasilita informasaun balun ligadu ho nasaun membru husi Konvensaun ne'e nian depoisde ratifika Konvensaun ne'e. Ida ne'e nu'udar baze ba sira atu kontinua halo diskusaun profunda antes submete sira nia paraser ba Meza Parlamentu Nasionál atu halo aprovasaun ka ratifika.

Tuir informasaun husi Komisaun Especializada rua ne'e katak agenda diskusaun ba apresisaun Konvensaun ne'e iha nia aprovasaun finál sei hala'o iha dia 04 Fevreiro 2021 iha munisípiu Aileu.

6) 21 Janeiro 2021

Komisaun A, iha reuniaun 21 Janeiro 2021 halo diskusaun no aprovasaun ba relatóriu pareser setoriál kona-bá Proposta Rezolusaun Nú. 3/V/82 kona-bá Arbitrajen, Proposta Lei Nú.15/V/(2)-kona-bá Autorizasaun Lejislativa Organizasaun Administrasaun Públika, Proposta Lei Nú.10/V/(2) kona-bá alterasaun Kódigu Prosesu Sivíl no Proposta Lei Nú.11/V/(2) kona-ba Rejime Jurídiku Arbitrajen Voluntaria no kontinua altera ba Kódigu Prosesu Sivíl.

Iha intervensaun, Presidente Komisaun A esplika katak Proposta Lei Nú.10/V/(2)-kona-ba alterasaun Kódigu Prosesu Sivíl ne'e atu halo adaptasaun ba Lei Arbitrazen ba iha Kódigu Prosesu Sivíl. Proposta lei ida-ne'e halo atu hetan autorizasaun husi Parlamentu Nasionál, maibé sei kolabora hamutuk ho órgaun soberanu sira seluk. Signifika materia ida-ne'e mós bele prepara husi Governu kuandu Parlamentu autoriza maski serbisu ida-ne'e kompeténsia Parlamentu nian.

Proposta Lei Nú.10/V/(2) hetan aprovasaun ho votu afavor 6, kontra 0, abstensaun 0. Deputadu sira ne'ebé fó votu afavor mak bankada Fretilin 4, PLP 1,P D 1 no Khunto 1. Bankada opozisaun CNRT la partisipa iha reuniaun ne'e.

Proposta Lei Nú.15/V/(2)-kona-bá autorizasaun ba Governu atu halo dekretu lei kona-bá atu altera materia lejislasaun Kódigu Prosesu Sivíl. Husi proposta ida-ne'e Parlamentu fó autorizasaun bá governu atu kria dekretu lei no rejime bá administrasaun públika. Tanba materia ida-ne'e konsidera governu mak sai ulun bá funsaun públika. Propsta ida-ne'e aprova ho votu afavor 6, kontra 0 no abstensaun 0.

Proposta Nú. 3/V/82- kona-baadezaun Timor-Leste ba Konvesaun Nova Iorque 1958 kona-ba rekoñesimentu no ezekusaun sentensa arbitrál estranjeira. Materia ida-ne'e atu fó autorizasaun ba Governu atu kria rejime jurídiku no hasai rezolusaun ida atu Timor-Leste addere ba Konvensaun Nova Iorque liga ho direitu arbitrajen disputa internasionál iha área komersiál. Proposta ida-ne'e aprova ho votu afavor 7, kontra 0 no abstensaun 0.

Relatóriu pareser ba proposta lei 4 ne'e Komisaun A sei submete ba iha Meja PN hodi halo diskusaun iha semana tuir mai.

Tuir agenda Komisaun A nian diskusaun ba proposta lei sira iha espesialidade sei ba halo diskusaun iha Aileu no Venilale.

Tuir observasaun JSMP, iha reuniaun Komisaun A husi inísiu to'o remata la hetan partisipasaun husi bankada opozisaun CNRT.

C. Publikasaun

Relasiona ho atividade Parlamentu Nasionál nian, JSMP prodús komunikadu imprensa 2 mak hanesan tuir mai ne'e:

- 1) JSMP apresia aas Parlamentu Nasionál ne'ebé hasai imunidade membru deputadu sira ho votu maioria kualifikada, publika iha 14 Janeiru 2021¹;
- 2) JSMP apresia iniciativa Komisaun A ne'ebé prepara ona kalendáriu serbisu Komisaun nian ba fulan neen (6) iha tinan 2021, publika iha 7 Janeiru 2021².

Aleinde publika iha pájina web, informasaun sira ne'e mós publika iha FB JSMP nian no mós iha *Jornál Diário Nacional* no *Timor Post*.

Konkluzau no rekomendasaun

Parlamentu Nasionál fulan Janeiru 2021 kontinua funsiona ho di'ak no efetivu tebes tantu iha reuniaun plenaria no mós reuniaun Komisaun A nian.

Parlamentu Nasionál produtivu tebes tantu iha Komisaun A no mós iha plenaria. Produtividade liuhusi halo diskusaun no aprovasaun ba proposta lei no rezolusaun sira ne'ebé mak sai prioridade no importante atu halo.

Deputadu sira husi bankada opozisaun CNRT kontinua la dun ativu iha prosesu diskusaun no aprovasaun ba ezbosu lei sira.

Nune'e, JSMP rekomenda atu Parlamentu Nasionál kontinua funsiona ho efetivu no produtivu, nune'e fokus ba diskute no aprova lei importante sira ne'ebé prezisa atu halo. JSMP mós rekomenda ba bankada opozisaun CNRT atu bele hases tiha interese partidaria hodi partisipa ativamente iha serbisu no funksionamentu Parlamentu Nasionál nian.

Atu hetan informasaun liután favór kontaktu:

Ana Paula Marçal

Diretora Ezekutiva JSMP

Email: ana@jsmp.tl

Website: <https://jsmp.tl/>

¹ Bele haree detallu iha ne'e: https://jsmp.tl/wp-content/uploads/JSMPPrLevantamentulmunidadePN_TETUM.pdf

² Bele haree detallu iha ne'e: <https://jsmp.tl/wp-content/uploads/JSMP-apresia-iniciativa-Komisaun-A-neebe-prepara-ona-kalendariu-serbisu-Komisaun-nian-ba-fulan-6-ih-tinan-2021-Janeiru-2021.pdf>